

DOMENIE V DI PASCHE

Jutoris pe Liturgjie

Domenie, ai 29 di Avrîl dal 2018

Domenie stade nus à compagnâts la imagine di Gjesù bon pastôr: Jo o soi il bon pastôr e o cognòs lis mès pioris e lis mès pioris mi cognossin me (Zn 10, 14). Chel vanzeli nus visave che, unîts a Gjesù, o vin di cirî di jessi pastôrs ancje nô a servizi des nestrîs comunitâts cristianis.

Vuê une altre imagine nus ven presentade; Gjesù nus dîs: Jo o soi la vît vere. Jo o soi la vît, vualtris i cjâfs. Chel ch'al reste in me e jo in lui, chel al bute une vore.

La vigne, la vît a son imagjinis di famee tal mont de Bibie, come che lu son ca e là pal Friûl e nus fasin ricuardâ lis vendemis, la ligrie, la fieste... Cussì e deventarà la comunitât dal Signôr se o restarìn unîts a lui. Di fat, la condizion e je clare: cence di me no podês fâ nuie.

La domande cumò e je: cemut stâ unîts a Gjesù? La rispueste e je: vivint tal spirt di Gjesù: Puartâur la buine gnove ai tribulâts, educâ a la responsabilitât civîl e religjose, liberâ chei che a son tibiâts (cfr. Lc 4, 18-19); simpri come sempliçs servidôrs che a disin: O vin fat dome ce che o vevin di fâ (Lc 17, 10).

Antifone di jentrade

cf. Sal 97,1-2

Cjantait al Signôr une cjante gnove parcè che il Signôr al à fatis robonis; al à palesade la sô justizie in face di ducj i popui, aleluia.

Si dîs Glorie a Diu.

Colete

Diu onipotent e eterni,
rifinìs di un continui in nô il misteri di Pasche
par che cul jutori de tô protezion a puedin rindi une vore
e rivâ a la gjonde de vite eterne
chei che tu ti sês indegnât di rinovâ cul sant batisim.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

At 9,26-31

Barnabe al contâ ai apuestui cemût che, par strade, Saul al veve viodût il Signôr.

Luche, come che ducj si sa, al è om di pàs e al conte di cuistions e di divisions dome se propit al scuen. Al è ce che al sucêt te lezion di vuê li che Pauli al rive a Gjerusalem par restâ peât a chê comunitât e invezit al ven malviodût e adiriture a tentarin di fâlu fûr tant che lu compagnarin a Cesaree e di li lu faserin partî par Tars.

Ancje lis nestrîs comunitâts a puedin sedi fruçonadis in divisions, spirtualitâts diferentis, devozions, cults di relicuiis, moviments... Luche nus da culî la regule d'aur de comunitât: e leve indenant tal timôr dal Signôr.

Vite e vanzeli, sacraments, comunitât e popul, scoltâsi cun rispiet e dâsi une man volintsi ben te maniere semplice e libare che il Signôr nus à volût ben.

Cussì la glesie e viveve in pàs.

Nol covente altri. E je la strade plui dificile ma ancje la plui sigure e vere.

Dai Ats dai Apuestui

In chei dîs, Pauli, rivât a Gjerusalem, al cirive di metisi insieme cui dissepui ma ducj a vevin pôre, che no ur pareve vere ch'al fos un dissepul ancje lui.

Alore Barnabe lu cjapà, lu menà dai apuestui e ur contà cemût che, par strade, al veve viodût il Signôr, che i veve fevelât, e cun ce fiât ch'al veve predicjât a Damasc tal non di Gjesù. D'in chê volte al leve e al tornave cun lôr a Gjerusalem, predicjant cence pôre tal non dal Signôr. Ur fevelave ancje ai eleniscj e al cuistionave cun lôr, ma lôr a tentarin di fâlu fûr. Vignûts a savê, i fradis lu compagnarin a Cesaree e di li lu faserin partî par Tars.

La glesie e viveve duncje in pês in dute la Gjudee, la Galilee e la Samarie. E cresseve simpri plui e e leve indenant tal timôr dal Signôr, imbombade dal confuart dal Spirtu Sant.

Peraule di Diu.

SALM RESPONSORIÂL

dal Salm 21

Se o scoltin chest salm dut intîr o restin maraveâts di ce che nus ven proponût. Di fat al è il salm de passion, dal Diu gno, Diu gno parcè mo mi âstu bandonât e che vuê al devente gjonde e ligrie. Cemût mai? I studiâts a disin che chest toc al è stât zontât al originâl plui tart e cussì il lament dal Vinars sant si è mudât te gjonde di Pasche.

Gjonde di Pasche parcè che al di là des persecuzions, la glesie e viveve in pês in Gjudee, Galilee e Samarie. E cresseve simpri plui e e leve indenant tal timôr dal Signôr, imbombade dal confuart dal Spirtu Sant. Cemût no viodi in chest l'azion dal Signôr? Però il Signôr al à dade e al darà une man ancje a la nestre vite e popul e comunitât...

Par chest: Ti laudi, Signôr, te seemlee dai fradis.

R. Ti laudi, Signôr, te seemlee dai fradis.

Se cjantât: Il cjant dai salms responsoriâi, p. 131.

O ben:

R. Aleluia, aleluia, aleluia.

Vualtris, ch'o temês il Signôr, laudaitlu,
gjernazie di Jacop, dait glorie a lui.

O sodisfasarai i miei avôts denant di chei che ti rispjetin.

I puars ch'a mangjin fin passûts,
ch'a laudin il Signôr chei che lu cirin,
ch'al vivi il lôr cûr par simpri. **R.**

Che si visi e ch'e torni dal Signôr

dute la int de tiere,

che si butin in zenoglon denant di lui

dutis lis gjernaziis dai popui.

Ducj i grancj de tiere a vignaran a riverîlu,

si plearan denant di lui ducj chei ch'a muerin. **R.**

La mê anime lui le à fate vivi:

lu servissarà la mê dissendence.

E laudarà il Signôr par simpri.

A vignaran e a contaran de sô justizie,

a disaran al popul ch'al à ancjemò di nassi:

«Chest e je propit la sô vore!». **R.**

SECONDE LETURE

1 Zn 3,18-24

Chest al è il so comandament: ch'o crodin e che si volin ben.

Chel ch'al reste in me e jo in lui, chel al bute une vore. *La seconde lezion nus vise cun clarece:* Chest al è il so comandament: ch'o crodin tal non di so Fi Gjesù Crist e che si volin ben un cul altri, seont il comandament che lui nus à dât.

No o vin di passa a travers chest esâm di fede e di amôr al prossim: e je la peraule di ordin e il pssepuart des nestrîs comunitâts.

De prime letare di san Zuan apuestul

Frututs, no stait a volê ben a cjâcaris e cu la lenghe, ma cui fats e te veretât. Di chest o cognossin ch'o sin nassûts de veretât e o podarìn meti in pâs il nestrî cûr denant di lui, ancje s'o vessin cualchi rimuars. Diu al è plui grant dal nestrî cûr e al cognòs dut. Miei cjârs, se il nestrî cûr nol à nuie ce rimproverânus, o vin confidence in Diu; dut ce ch'o domandin lu vin di lui parcè che o metin in pratiche i siei comandaments e parcè che o fasìn ce che lui al à agrât. Chel ch'al met in pratiche i siei comandaments al reste in Diu e Diu in lui. E di chest o savin ch'al reste in nô: dal Spirt che nus à dât.

Peraule di Diu.

CJANT AL VANZELI

Zn 15,4-5

R. Aleluia, aleluia.

Restait in me come che jo o soi in vualtris, al dîs il Signôr; chel ch'al reste in me al bute une vore.

R. Aleluia.

VANZELI

Zn 15,1-8

Chel ch'al reste in me e jo in lui, chel al bute une vore.

Pai profetis, il vignâl dal Signôr al jere il popul di Israel un pôc fedêl e tant infedêl; però ancje la nistre glesie local o podin viodile come vignâl fedêl e infedêl al Signôr.

Provìn alore a pensâ ce che al podarès dînus chest vanzeli come comunitât cristiane di paîs; a ce che al podarès riferîsi chel: lu cjonce... lu cerpîs... al ven butât fûr... si secjarà; e cemût diventâ chel vignâl li che vualtris o rivais a produci un grum.

Dal vanzeli seont Zuan

In chê volte, Gjesù al disè ai siei dissepui: «Jo o soi la vît vere e gno Pari al è il contadin. Ogni cjâf che in me nol bute nuie lu cjonce, e ogni cjâf ch'al bute lu cerpîs, par ch'al buti inmò di plui.

Vualtris o sês za monts pe peraule che us ai contade. Restait in me come che jo o soi in vualtris. Come che il cjâf nol pò fâ uve par cont so, se nol reste te vît, cussì nancje vualtris, se no restais in me. Jo o soi la vît, vualtris i cjâfs. Chel ch'al reste in me e jo in lui, chel al bute une vore, parcè che cence di me no podês fâ nuie. Se un nol reste in me, al ven butât fûr come une vidice e si secjarà; po lu tire dongje e si lu bute tal fûc a brusâ. S'o restais in me e lis mês peraulis a restin in vualtris, domandait dut ce ch'o volês e us sarà fat. In chest al è stât glorificât gno Pari: che vualtris o rivais a produci un grum e ch'o diventais cussì miei dissepui».

Peraule dal Signôr.

Si dîs O crôt.

Su lis ufiertis

Diu, che pal incuintri sant di chest sacrifici tu nus fasis vè part de tô divinitât uniche e infinide, danus, par plasê, di testemoneâ cuntune vite degne la tô veretât ch'o vin cognossude.

Par Crist nestrî Signôr.

Antifone a la comunion

Zn 15,1.5

Jo o soi la vît vere e vualtris i cjâfs,
al dîs il Signôr;
chel ch'al reste in me e jo in lui,
chel al bute une vore, aleluia.

Daspò de comunion

Signôr, ti preìn, cjale di bon voli il to popul
e, daspò di vêlu inscuelât cui misteris dal cîl,
dai di passâ de viere a la gnove vite.
Par Crist nestri Signôr. Amen.

* * *

Riflession di pre Antoni Beline: **La vît e i cjâfs**

No vin di confondi il mût di fevelâ di Crist, cussì uman, cussì sclet, cussì clâr, cu la sostanza di ce che al dîs. Parcè che Crist, sint om cence peje, al pò meti in vøre dute la potenzialitât umane che al à intorsi e in plui reonzile cun ce che i diven de sô divinitât. Crist bon cence fin, dolç plui di une mari...

Cjants pal timp di Pasche

- Contait la buine gnove, *n. 66*;
- Crist nus da la sô lûs, *n. 158*;
- Victimae paschali laudes, *n. 159*;
- I cristians a cjantin laude, *n. 160*;
- Aleluia... O filii et filiae, *n. 161*;
- Sta legre, sante Glesie, *n. 162*;
- Christ ist erstanden, *n. 163*;
- Crist al è in vite, *n. 164*;
- Cristo risusciti, *n. 165*;
- Grosser Gott, *n. 166*;
- Al Agnel sacrificât, *n. 167*;
- Hvala veçnemu Bogu, *n. 168*;
- Te lodiamo Trinità, *n. 169*;
- Laudate Dominum, *n. 170*;
- O sin resurîts a la vite, *n. 171*;
- Benedete la zornade, *n. 172*;
- Il nestri Redentôr, *n. 173*;
- Si cjanti al Pari laut in cîl, *n. 174*;
- Nei cieli un grido risuonò, *n. 175*;
- O Cristo, sol di Pasqua, *n. 176*.

Salm 94 : Vignît, batìn lis mans al Signôr, *n. 256*;

“ **80** : Gjoldêt in Diu nestre fuarce, *n. 256*;

“ **92** : Il Signôr al regne, *n. 258*;

“ **97** : Cjantait al Signôr une cjante gnove, *n. 261*;

“ **113a** : Cuant che Israel dal Egjit al è jessût, *n. 265*;

“ **113b** : No a nô, Signôr, no a nô, ma al to non dai glorie, *n. 266*.

Tal libri Hosanna, si puedin cjatâ ancjemò altris cjants e salms adats al timp di Pasche.

* * *

E je a pene stade la fieste di s. Marc, l'evangjelist tant cjâr a la nestre glesie e tradizion di Aquilee. Ricuardinlu tes peraulis che Pieri al scrîf di lui e preinlu che no si dismentei des nestris comunitâts.

*Us salude la comunitât che e je stade sienzude come vualtris e che e vîf in Babilonie,
e ancje Marc, gno fi.*

Saludaitsi un cul altri cuntune bussade di amôr.

Pâs a ducj vualtris che o sês in Crist.

1 P 5, 13-14